

Incumbensa Tenchio concernent l'introducziun d'ina assicuranza naziunala da donns da terratrembels

Ils 30 da zercladur 2017 ha la conferenza da las regenzas en fatgs da militar, da protecziun civila e da pumpiers (CR MCP) deliberà in document cun valurs directivas per stgaffir in concordat interchantunal per in'assicuranza obligatorica da donns da terratrembels (CIAT). Ella è stada da l'avis d'introducir in concordat, sch'il dumber da chantuns che sa participass cuvriss ensemen almain 85 % dals edifizis e da las valurs materialas da la Svizra che stuessan vegnir assicurads. Ils 26 da settember 2017 ha la conferenza da las regenzas chantunalas (CdC) realisà ina consultaziun tar las regenzas: Ils chantuns èn vegnids envidads da s'exprimer sin basa dal document menziunà liantamain davart l'idea da stgaffir in CIAT. 13 chantuns (BE, UR, OW, NW, GL, FR, SO, BS, BL, SH, SG, VS, JU) beneventan l'elavuraziun d'in concordat. 10 chantuns (ZH, LU, SZ, ZG, AR, AI, AG, TG, VD, NE) refusan in tal per differents motivs. Trais chantuns (GR, TI, GE) refusan bain da princip in concordat, fissan dentant eventualmain prontos da sa participar ad ina soluziun da concordat, sch'in tal vegniss elavurà. Perquai ch'il dumber necessari d'almain 85 % edifizis e valurs materialas assicuradas en Svizra n'è betg vegnì cuntanschì, desista ussa la CdC da dar a la CR MCP in mandat per elavurar in CIAT, uschia che la realisaziun d'in concordat interchantunal sin basa da la solidaritad ha fatg naufragi.

Ina gronda part dal territori dal chantun Grischun è exponì ad in privel da terratrembels mesaun, l'Engiadina ad in grond. Edifizis d'abitar e da fatschenta construids uschia ch'els pon resister a terratrembels vegnan concepids en Svizra per vibraziuns che pon vegnir spetgadas en quel lieu en media ina giada entaifer 500 onns. Il terratrembel il pli ferm ch'è enconuscent en il Grischun hai dà l'onn 1295 en la regiun da Churwalden (intensitad VIII). Sch'el avess da sa repeter, fissan da spetgar donns totals da var 12 milliardas francs entaifer il chantun. Quels vegnissan finanziads mo per ina pitschna part or dal pool svizzer per cuvrir donns da terratrembels existent. Cf. sin <http://www.seismo.ethz.ch/de/knowledge/earthquake-country-switzerland/index.html> la charta dals epicenters da tut ils terratrembels cun ina magnituda da 2 ch'èn vegnids registrads cun instruments da l'onn 1975 fin l'onn 2015.

Il terratrembel – uschia il CR MCP en ses document – è il privel da la natira cun il potenzial da donns il pli grond per la Svizra, è dentant suttaless mo ad in'assicuranza facultativa cun premias relativamain autas. Er sch'i dat relativamain darar terratrembels fermes en Svizra, èn quels ina gronda ristga per ils umans e per las valurs materialas e chaschunan donns enorms per l'economia publica (e quai per las abitantas ed ils abitants, per las proprietarias ed ils proprietaris d'in bain immobigliar sco er per las bancas che finanzieschan credits). Pervia dal fitg grond potenzial da donns da terratrembels en Svizra ed en il Grischun e perquai ch'i manca er vinavant ina garanzia tras l'assicuranza da donns da terratrembels, sto vegnir stgaffida – pervia dal naufragi da la soluziun da concordat – in'assicuranza naziunala da donns da terratrembels solidarica che vegn repartida sin plirs purtaders dals custs (las 19 assicuranzas chantunalas d'edifizis e las assicuranzas privatas dals chantuns GUSTAVO [GE, UR, SZ, TI, AI, VS und QW], la confederaziun sco er las proprietarias ed ils proprietaris).

Perquai che las stentas dals chantuns per far in concordat, che sa basa sin il princip da solidaritad, han fatg naufragi, vegn la regenza incumbensada – sin fundament da l'art. 160 Cst. e da l'art. 59 al. 1 da la constituziun dal chantun Grischun (CC; DG 110.100) – d'inoltrar a l'assemblea federala ina iniziativa dal chantun che pretenda d'introducir in'assicuranza naziunala da donns da terratrembels per edifizis e per lavurs da rumida cun ina participaziun da la confederaziun e da las assicuranzas sco er cun premias supportablas per las proprietarias ed ils proprietaris.

Cuira, ils 16 d'avrigl 2018

Tenchio, Niggli (Samedan), Albertin, Atanes, Blumenthal, Bondolfi, Caduff, Caluori, Casanova (Glion), Casutt-Derungs, Cavegn, Caviezel (Cuira), Crameri, Darms-Landolt, Della Vedova, Dermont, Dosch, Epp, Fasani, Florin-Caluori, Foffa, Joos, Locher Benguerel, Märchy-Caduff, Michael (Castasegna), Monigatti, Niederer, Noi-Togni, Perl, Pult, Sax, Tomaschett (Breil), Tomaschett-Berther (Trun), von Ballmoos, Zanetti, Berther (Segnas), Buchli (Tenna), Degiacomi, Lombardi